

Священномученики Павел Аношкин и Григорий Смирнов

На велицей вечерни

На Господи, воззвах: стихиры 8, глас 4.

Подобен: Яко добля:

Приидите, хвалу воздадим Господу Богу нашему,/ память новомучеников прославляюще,/ служителей верных,/ исповедников и мучеников Христовых твердых,/ Пермская земли утверждение!/ Тии бо слово Господне соблюдоша,/ вся до конца притерпеша/ и Церкви Русской похвала и слава явишася./ Ихже мощи святая лобызающе,/ молитву к ним простираем:/ оградите нас от бед, священномученицы Павле и Григорие, заступлением вашим/ и испросите нам у Господа велию милость.

Плач умиленный Павел сотвори,/ со сверстники юными сый на месте свяtem,/ идже стоясте нозе Твои, Господи,/ темже, сострадания и благодарения исполнився/ и духовне Животворящий Твой Крест облобызав,/ светом Воскресения адамант соделася/ и, посреде нощи безбожия благодатию возсияв,/ твердость древних мученик яви/ и смерть от безбожных мужественне прият.

Не на земли сокровище себе скрыл еси,/ Григорие досточудне,/ но в сердце, к Богу глаголющем/ псалмы и пеньми и песньми духовными./ Сия от юности паче зата возлюбив,/ себе самаго духовно усовершил еси,/ и люди общники сего богатства сотворил еси,/ еже в любовь Божию скоро возводит,/ даже до мученическия славы.

И к конем привязуеми,/ и мразом ночным истязаеми,/ и сечении мечными люте ураняеми,/ храмы явистесь Духа Святаго,/ страстотерпцы Христови,/ младости своея не пощадившии./ Темже, яко мужи совершеннии,/ к Богу возшедше,/ Того молите, даровати людем земли Русской/ мир и велию милость.

Ины стихиры, глас 1.

Подобен: Всехвальни мученицы:

Любовию Христовою связуеми,/ Павле и Григорие доблии,/ ко спасению многия люди настависте,/ образ братолюбия святых показующе,/ еже жити

братии вкупе, вкупе же и умрети./ И ныне молитеся ко Господу,/ да ничтоже разлучит ны от любве Божия.

Всяк град земли Пермския празднует,/ известие приемь об обретении святых мощей ваших,/ заступницы наши и молитвенницы,/ священномученицы Павле и Григорие,/ не под спудом, но на свещнице днесъ возсиясте,/ Христа проповедающе,/ Распятием и Воскресением мир спасшаго/ и даровавшаго нам велию милость.

Слава, глас 3:

Коль добро или коль красно,/ во еже жити братии вкупе,/ сице мысляху священномученицы Твои, Господи,/ ихже бо служение у Престола Божия/ братию по духу сотвори,/ любовь же ко Христу страдати даже до крове укрепи./ Тех молитвами, Боже, утверди и нас в братолюбии.

И ныне, Богородичен: Како не дивимся:

Вход. Прокимен дне. И чтения 3 мученическая.

На литии стихирь, глас 1:

Первострадалец Христов, Стефан боговенчанный,/ виде небеса отверста/ и Сына Божия одесную Отца стояща,/ вы же, страдальцы честнии,/ Павле иерею и диаконе Григорие,/ небесными венцы украшеннии,/ с сонмом мученик одесную Господа предстоите,/ молитеся убо и нам шуя части избавитися.

Слава, глас 4:

Павле, доброе Кунгура воспитание,/ и Григорие, сыне Вятския земли,/ в пределах Пермских Христу добре послужившии,/ от оружных устрелени бысте/ и яко ангели просветистесь./ Славу же Распеншагося нас ради зряще/ и, яко победители, велие дерзновение имуще,/ с мученики новыми молите Господа/ спастися душам нашим».

И ныне, Богородичен: Призри на моления:

На стиховне стихиры, глас 6.

Подобен: Тридневен:

Усердия Андроникова в вере наследницы,/ Павле и Григорие славни,/ пострадасте до крове, подвигу архипастыря последствующе./ Темже Христа Бога молите,/ сердце верное даровати/ всем почитающим страдания ваша.

Стих: Священницы Твои облекутся в правду/ и преподобний Твои возрадуются.

Не дасте братоубийству благословения,/ сего ради со братией предел Мокинских/ убиени бысте без милости,/ милость проповедавши/ и убийцы своя благословивши,/ да познают, омраченнии, свет покаяния.

Стих: Честна пред Господем/ смерть преподобных Его.

Красуйся и радуйся, Пермская земле,/ память новомучеников празднующи,/ тии бо предстоят Христу во славе,/ о людех твоих молящеся,/ подвиги их воспевающих/ и к святым мощем их с любовию припадающих.

Слава, глас 5:

Правнуцы бывше изгнанных из рая/ за безсловесное стремление,/ ови Каиново братоубийство умножиша,/ ови лихоманию Иудину подражаша./ Вы же, мученицы доблии,/ словесы Евангельскими просвещеннии/ и молитвою церковною освященнии,/ ратование неправое и лютое отринусте,/ браны междуусобней не приобщистесь,/ сего ради во единем часе/ мученичеством восхитисте Царствие Небесное.

И ныне, Богородичен: Храм и Дверь еси:

Тропарь, глас 5:

Честное страдание ваше/ за веру святую Православную/ к веселию духовному вся люди созывает,/ священномученицы, Павле и Григорие,/ вы бо, землю Пермскую кровьми своими освятивше,/ любви совершенней научаете,/ душу полагати за Христа, Бога нашего,/ Светом Воскресения мир обновившаго.

На утрени

По 1-м стихословии седален, глас 5:

Мраз претерпевше и биение, и коньми влачение, и ребр прободение, святии мученицы Павел и Григорий радовахуся, от оружных бо устрелени бывше, душею во Обители Небесныя вознесошася. Тех молитвами, Христе Боже, спаси души наша.

Слава, и ныне, Богородичен:

Споручнице грешных и Утешительнице скорбящих, Пречистая Мати Божия Обрадованная, Пермскую землю иконами Твоими украсившая и святых множество в ней воспитавшая, Твоими ко Христу молитвами спаси души наша.

По 2-м стихословии седален, глас 2:

Сосуди честнii, благодати Божия исполненний, священномученицы Павле и Григорие! Вы, молитвою усердною души ко страданию уготовавше, житие временное сохранити не искасте, но потщастся Небеснаго Царствия достигнути, темже и жители его святыя други себе стяжасте.

Слава, и ныне, Богородичен:

Благоутробия сущи источник, милости сподоби нас, Богородице, призри на люди согрешившия, яви яко присно силу Твою, на Тя бо уповающе, радуйся, вопием Ти, якоже иногда Гавриил, безплотных архистратиг.

Величание:

Величаем вас,/ священномученицы Павле и Григорие,/ и чтим честная страдания ваша,/ яже за Христа/ претерпели есте.

Псалом избранный: Бог нам Прибежище и Сила:

По полиелеи седален, глас 8:

Повеленное во Евангелии приемше в разуме, в церкви Божией единомышлением ходисте, святии, глаголом жизни вечныя люди Божии учаще и красоту веры Православныя им показующе, юже да сохранит Господь непоколеблему от всех навет вражиих в земли Русстей, непрестанно взывающей: Пресвятая Троице, Боже наш, слава Тебе.

Слава и ныне, Богородицен:

Повеленное тайно приемь в разуме, в крове Иосифове тщанием предста безплотный, глаголя Неискусобрачней: Приклонивый схождением Небеса, вмещается неизменно весь в Тя. Егоже и видя в ложеснах Твоих, приемша рабий зрак, ужасаюся звати Тебе: радуйся, Невесто Неневестная.

Степенна, 1-й антифон 4-го гласа. Прокимен, глас 4: Проидохом сквозе огнь и воду,/ и извел еси ны в покой. Стих: Разжегл ны еси, якоже разжигается сребро. Всякое дыхание: Евангелие от Матфеа, начало 36.

По 50-м псалме стихира, глас 6:

Священномученицы славни Павле и Григорие,/ подвига мученичества сподобльшеся,/ вся грады и веси земли Пермского воздвигаете/ почитати мощи ваша, нам дивно явленныя,/ зане христианы добрыми, память вашу хранящими,/ многа лета от поругания соблюдаеми быша,/ ныне же в храме лучи благодати нам простирают/ и вся верныя научают,/ како подобает жити и за Христа страдати.

Канон, глас 8.

Песнь 1

Ирмос: Воду прошед, яко сушу,/ и египетского зла избежав,/ израильтянин вопияше:/ Избавителю и Богу нашему поим.

Мужеством и крепостию души ваша украсивше и верность Христу в житии сохранившее, вечного покоя достигли есте, священномученицы Павле и Григорие.

Павла почтим, страдальца добropобеднаго, священную ризу кровыми белу соделавшаго, есть бо Пермский земли красота и Мокинский веси слава.

Песненно возвеличим диакона Григория, иже смерть, яко ходатаицу к лучшей жизни, приим, днесь непрестанно возсылает хвалу Избавителю и Богу нашему.

Страданием святых Севастийских мучеников подобницы явистесь, страстотерпцы славни, мразом бо искушившеся, воини добropобеднии Царя Христа показастесь.

Богородичен: Оружие пройде Твою Пресвятую душу, егда распинаема видела еси волею Сына и Бога Твоего, Егоже, Благословенная, молящи не престай, прощение прегрешений нам даровати.

Песнь 3

Ирмос: *Небеснаго круга Верхоторче, Господи,/ и Церкве Зиждителю,/ Ты мене утверди в любви Твоей,/ желаний Краю, верных Утверждение,/ Едине Человеколюбче.*

Мучению лютому без милости предани бысте, святии страстотерпцы, обаче плоды любве Христовы принесосте нас ради пострадавшему Господу Человеколюбцу.

Дом Божий зело возлюбил еси, священномучениче Павле, идже молитву благоговейне совершал еси, темже и нам помози в храме усердно Господеви молитву возносити.

Церковными гласы, еще отрок сый, Бога прославлял еси, святе Григорие, темже и призва тя Господь, яко вернаго слугу Своего, в диаконстем чине Тому усердно послужити.

Всем верным паству церкве Никольския наставницы мудрии явистесь, священномученицы, озаряюще души, помраченныя грехом, и к свету богоразумия наставляюще.

Богородичен: Пречистая Дево, Русь зело возлюбившая, и землю нашу чудным светом честных икон Твоих озарившая, страдальцев Пермских сонм собравши, в вере Православней нас утверди до скончания века.

Седален, глас 3:

Проповедницы Православныя веры явльшеся и ревности о храме Божии исполнышеся, служение усердно совершили есте и страдание достойно восприяли есте, святии Павле и Григорие. И ныне молитеся ко Господу, даровати нам мир и велию милость.

Слава, и ныне, Богородичен:

Божественная скиния была еси Слова, едина Пречистая Мати Дево. Утешительница в скорбех сущи, гонимым за Христа всегда помогаеши и

водами Божественных молитв Твоих духовную жажду утоляеши, подающи всем велию милость.

Песнь 4

Ирмос: Услышах, Господи,/ смотрения Твоего таинство,/ разумех дела Твоя/ и прославих Твое Божество.

Прослави вас Господь, преподобномученицы добропобеднии, воини бо есте духовнии и свет благодати чистый, священномученика Андronика Пермского наследницы.

Врач недугов душевных и мудрый наставник отроком был еси, отче Павле, темже тя славит Пермская земля.

Познав любовь Христову и духом пламенея, в храм Божий притекл еси, священномучениче Григорие диаконе, да послужиши тамо усердно.

Благочестно поживше и страдания путь терпеливно восприимше, священномученицы славнии, сугубую мзду на Небесех восприяли есте.

Богородичен: Всегда припадаем, Марие Дево, к Твоей милости, Ты бо верным щит еси и новых мучеников крепость.

Песнь 5

Ирмос: Просвети нас повелении Твоими, Господи,/ и мышицею Твою высокою/ Твой мир подаждь нам,/ Человеколюбче.

Благочестия рачительне явилися есте, Павле и Григорие премудрии, зане избрасте часть благую.

От юности святость града Иерусалима возлюбив, Павле священне, Голгофу место слезами омыл еси, идеже и тайну Креста Господня познал еси.

Григория, диакона славнаго, днесъ, верний, почтим, иже смиренный сослужитель благоговейному иерею Павлу явися и вкупе с ним за Христа пострада.

Ничтоже возможе разлучити вас, священномученицы, от любве Христовы: ни скорбь, ни гонение, ни смерть, вся бо сия мужественне претерпели есте.

Богородичен: При Кресте Сына Твоего всыновися мир Тебе, о Дево Пресвятая, пречестных мучеников Крепосте и Утешение.

Песнь 6

Ирмос: *Молитву пролио ко Господу/ и Тому возвещу печали мои,/ яко зол
душа моя исполнися/ и живот мой аду приближися,/ и молюся, яко Иона,/ от
тли, Боже, возведи мя.*

Новомученики Пермских днесь прославим, тии бо смерти не убоявшись и кровьми своими землю нашу освятиша. Тех молитвами, Христе Боже, спаси души наша.

Христа всем сердцем возлюбив, смерть за Него доблестно претерпел еси и наветы безбожных посрамил еси, отче Павле. Темже молим тя: помози и нам в любви тебе подражати и Господеви благоугождати.

Молитвами боголюбиваго Григория благодать нам подаждь, Христе Боже наш, твердую веру, пламенную любовь и Давидову кротость стяжати и заповеди Евангельских усердно исполняти.

Коль многое терпение священномучеников Павла и Григория! В лютый мраз коньми по земли влакими, мучими зле и мечем побиени бывше, обаче безбожное неистовство смирением победиша и за Христа пострадаша.

Богородичен: Егда ученицы вси, кроме Иоанна юна, от Креста бежаша и, страхом одержими, Христа оставиша, Ты, Дево Пречистая, с Ним пребыла еси. Темже молим Тя: в верности Богою пребывать нам помози.

Кондак, глас 3:

Пастырю добрый Павле/ и святолепнаго служения рачителю Григорию,/ паству вашу словом просветившии,/ святыни Церкве Христовы зело возлюбившии/ и веры ради смерть мученическую приемшии,/ ныне землю Пермскую благодатию просвещаете/ и святыня ея бываете,/ мощми своими бесмертие проповедающе/ и исцеления тощае всем, с верою к вам притекающим.

Икос:

Восхвалим, людие, двоицу святых страстотерпцев,/ духом мужественного иерея Павла/ и благоговейнейшаго диакона Григория,/ иже, союзом братского любве связуеми,/ за Христа пострадати сподобишася,/ в наша же дни святыя мощи своя во утешение и укрепление всем явиша,/ безсмертне проповедающе и чудеса источающе./ Темже к ним с любовию возопии:/ радуйтесь, священномуученицы Павле и Григорие, земли Пермския похвало и украшение.

Песнь 7

Ирмос: *От Иудеи дошедше, отроцы/ в Вавилоне иногда/ верою Троицескою пламень пещный попраша, поюще:/ отцев Боже, благословен еси.*

Кто не ужаснется огненного искушения, на Отечество наше пришедшего, верных людей убиение, святых храмов разрушение, детей сиротство и веры Православныя попранье! Но, Господи, Иисусе Христе Боже, помилуй землю Русскую и спаси души наша.

Мучителей лукавое безбожие не возможе поколебати твердости души твоея, священномуучениче Павле, темже, яко имея дерзновение ко Господу, моли, да люди греховнаго плена избегнут и достойныя плоды покаяния принесут.

Святе Григорие, образ верности Христу и терпеливаго страдания показавый, молися о нас, чтуших твой крестный подвиг, да верная чада Церкве Русския пребудем даже до смерти.

Слагающе в сердце своем глагол Христов, еже не боятися убивающих тело, души же не могущих убити, мужественне на подвиг страдания потекли есте, священномуученицы Павле и Григорие.

Богородичен: Сына Воскресшаго зretи чающи, яко мироносицы жены, Мати Дево, ко Гробу притекла еси зело заутра, учащи нас утреневати к Богу.

Песнь 8

Ирмос: *Царя Небеснаго,/ Егоже поют вои Ангельстии,/ хвалите и превозносите во вся веки.*

С пределы Пермскими ликуют людие веси Мокинсия, радующиеся обретению в ней святых мощей священномучеников Павла и Григория, и молятся им, яко своим помощником и заступником.

Тебе молящеся, священномучениче Павле, согласно взываем: да пробavit Господь милость Свою на нас и приимем любовь Христову в душах наших.

Святе Григорие, диаконе досточудне, молися Господу за люди веси Мокинсия и всяя Пермская земли теплый представитель буди.

Отца и Сына и Духа Святаго, Троицу Единосущную и Нераздельную, в житии вашем прославили есте, священномученицы добропобедни, темже и Бог вас прослави и Царствия Небеснаго наследники сотвори.

Богородичен: *Д*несь людие Пермстии обстоят раку святых новомучеников иеря Павла и диакона Григория, взывающе: о, теплии наши представление, молите Христа Бога и Пречистую Его Матерь, спаси душам нашим.

Песнь 9

Ирмос: *Воистину Богородицу/ Тя исповедуем,/ спасеннии Тобою, Дево Чистая,/ с Безплотными лики Тя величающе.*

Земля издаде безценнное сокровище, мощи священныя Григория и Павла, воинов Христовых добропобедных, от всякаго вреда пределы Пермская защищающих.

О, Павле, честный иерею, священства красото и верных представлю! Помози нам молитвами твоими мир Христов стяжати и подвигом добрым неленоство подвизатися.

О, славне Григорие, добрый воине Христов и доблий страдальче! Помози нам сердце чистое соделати и спасение душ улучити.

О, светоноснин мученицы, Пермских предел похвало и украшение! Испросите у Господа Бога и Пречистыя Его Матере оставления всех наших грехов, да избавимся вечнаго осуждения и причастницы Небеснаго Царствия явимся.

Богородичен: Сохрани от бед рабы Твоя, Пречистая Дево, Тя бо теплую Предстательнищу к Сыну Твоему имамы и Тобою спасение улучити надеемся.

Светилен:

Светлый венец от Солнца Правды, Христа, стяжавше, страстотерпцы святии, светозарно всех просвещаете и чтущия святую память вашу благодатно озаряете.

Слава, и ныне, Богородичен:

Пречистая Мати Дево! Светом незаходимым нас просвети, да в радости ликующе, прославим свет нам Показавшаго.

На хвалитех стихиры, глас 8.

Подобен: О, преславнаго чудесе:

О, всехвальни новомученицы,/ Пермская земли похвало,/ в годину брани лютейшия/ от безбожных невинно пострадавшии,/ иерею Павле, смирением украшенный,/ и диаконе Григорие, духом пламенеяй,/ в молитвах теплых испросите/ раку мощей ваших обстоящим/ мир и велию милость.

Не токмо мучеников раны телесныя,/ но и власи священнии/ изочтени суть у Бога,/ Хранящаго вся кости их,/ и души их в руце Своей Содержащаго,/ и молитву их скоро Приемлющаго./ Темже, святии Павле и Григорие,/ помозите нам Господеви благоугодити/ и труды покаянными сердце очистити.

Яко благовейний служителie Христови,/ Павле и Григорие блаженнии,/ вы, Безкровную Жертву приносяще,/ о людех усердно молилися есте,/ да тихое и безмолвное житие поживут,/ христианския кончины живота сподобятся./ Помозите и нам богоугодне житие скончати,/ добный ответ на Страшнем Судищи Христу Богу воздати/ и милость в День страшного воздаяния улучити.

Чадом кротость и послушание,/ мужем и женам благочестие,/ иноком ревность о Бозе,/ святителем укрепление,/ богохранимей стране нашей благоверие,/ и Церкви Русстей во истине стояние/ испросите у Господа,/ священномуученицы Павле и Григорие,/ Пермская земли украшение.

Слава, глас тойже:

Пророчески Давид во псалмех вопияше:/ проидохом сквозе огнь и воду,/ и извел еси ны в покой./ И вы, священномученицы Павле и Григорие,/ огнь злобы мучительская безбедно проидосте/ и воду слез о супружницах и чадех,/ о роде, и друзьях, и о пастве своей в душах удержасте,/ да в вино любве Божия претворится/ и с чашею страдания вашего срастворится./ Темже ныне от всех прославляется.

И ныне, глас тойже:

Владычице, приими молитвы раб Твоих,/ и избави нас/ от всякия нужды и печали.

Славословие великое. И отпуст.

На Литургии

Блаженна от канона, песни 3-я и 6-я. Прокимен, глас 7: Честна пред Господем/ смерть преподобных Его. Стих: Что воздам Господеви о всех, яже воздаде ми? Апостол к Римлянам, начало 99. Аллилуиа, глас 2: Священницы Твои облекутся в правду, и преподобнии Твои возрадуются. Стих: Бог нам Прибежище и Сила, Помощник в скорбех, обретших ны зело. Евангелие от Луки, начало 106. Причастен: В память вечную будет праведник:

Молитва

О, новомученицы славнии, иерею Павле и диаконе Григорие! Днесь, верно сошедшеся, восхваляем честная страдания ваша, яже в годину тяжкую гонений на Церковь Русскую претерпесте. Почитаем и братскую любовь вашу, веры бо нравом связуем, яко единодушний сослужителie, согласно и муки за Христа приясте. Ублажаем любовь вашу, псалмопевца бо глаголы в час испытания воспомянусте, яко добро и красно жити братии вкупе, благо же есть и в Царствии Небеснем вкупе радоватися. Дивимся долготерпению вашему, ни мраз бо, ни раны, ни коными истязание от Бога вас разлучиша. Покланяемся честным мощем вашим, до времене под спудом земным сокровенным, напоследок же, яко некий дар светоносный, всей земли Пермской возсиявшим. Ныне молите Великодаровитаго Бога, явлением мощей ваших нас,

недостойных, Почтившаго, да пробавит молитвами вашими милость Свою ведущим веру Православную, да обратит к ней отпадшия, да укрепит верныя в стоянии за правду Божию, да сподобит нас от мощей ваших почерпнути исцелений Божественное действие, благодать и милость, и да дарует нам единеми усты и единем сердцем славити и воспевати Пречестное и Великолепное Имя, Отца и Сына и Святаго Духа, ныне и присно и во веки веков.

Аминь.